



Parlamentarna komisija odgovorna za reviziju
Parlamentarno povjerenstvo odgovorno za reviziju

Парламентарна комисија одговорна за ревизију

Broj: 04/1-02-854/26-3

Sarajevo, 27. 3. 2026. godine

**ČLANOVIMA
PARLAMENTARNE KOMISIJE
ODGOVORNE ZA REVIZIJU**

Dana 26. 3. 2026. godine, održana je 29. sjednica Parlamentarne komisije odgovorne za reviziju Parlamenta Federacije BiH (u daljem tekstu: Komisija). Sjednici Komisije prisustvovali su svi članovi Komisije i samim tim ispunjeni su svi uslovi za punovažan rad u pogledu kvoruma i odlučivanja. Pored članova Komisije, na 29. sjednici Komisije prisustvovali su Mirza Kudić, generalni revizor, Nina Džidić zamjenica generalnog revizora, Marijana Miličević, sektorski rukovodilac i drugi predstavnici Ureda za reviziju institucija u Federaciji BiH.

Predsjednik Komisije je predložio **dnevni red**, koji je jednoglasno usvojen, a koji glasi:

1. Usvajanje zapisnika sa 28. sjednice Parlamentarne komisije odgovorne za reviziju,
2. Informacija o kriterijima Ureda za reviziju institucija u Federaciji BiH za pripremu i izradu plana revizije,
3. Godišnji finansijski izvještaj za 2025. godinu Ureda za reviziju institucija u Federaciji BiH
4. Tekuća pitanja.

Na osnovu člana 44. Poslovnika Predstavničkog doma i člana 41. Poslovnika o radu Doma naroda, a u vezi sa članom 54. Poslovnika Predstavničkog doma Parlamenta Federacije BiH i člana 52. Poslovnika o radu Doma naroda Parlamenta Federacije BiH, Komisija podnosi sljedeći:

IZVJEŠTAJ

1. **Usvajanje zapisnika sa 28. sjednice Parlamentarne komisije odgovorne za reviziju**

Komisija je razmatrala zapisnik sa 28. sjednice Parlamentarne komisije odgovorne za reviziju i jednoglasno ga usvojila.

2. Informacija o kriterijima Ureda za reviziju institucija u Federaciji BiH za pripremu i izradu plana revizije

Predsjednik Komisije je informirao prisutne da je Ured za reviziju institucija u Federaciji BiH dostavio informaciju o kriterijima Ureda za reviziju institucija u Federaciji BiH za pripremu i izradu plana revizije. Predmetna informacija dostavljena je na inicijativu člana Komisije Mirsada Zaimovića, koju je uputio tokom prethodnog zasjedanja. U svrhu detaljnijeg obrazloženja dostavljenog materijala, riječ je dobio generalni revizor Ureda za reviziju institucija u F BiH. Generalni revizor istakao je da je Ured za reviziju u proteklom periodu usmenim putem članovima Komisije obrazložio metodologiju i kriterije rada Ureda za reviziju institucija u F BiH, te da je također dostavio i Matricu rizika, po kojoj se vrši ocjenjivanje subjekata prilikom pripreme i izrade plana revizije. Ovaj put je Ured dostavio sveobuhvatnu informaciju sa ciljem upoznavanje članova Komisije s metodologijom i kriterijima koji se primjenjuju pri kreiranju godišnjih planova revizije, te ukazao na usklađenost postupaka Ureda s utvrđenim revizorskim standardima i kriterijima. Naglasio je da prilikom pripreme i izrade plana revizije svaki sektorski rukovodilac daje svoje prijedloge uzimajući u obzir Matricu rizika, a konačne odluke se donose jednoglasno na sjednicama Kolegija Ureda.

Poseban osvrt dao je na reviziju Općine Kakanj i povezanih subjekata, što je bila tema rasprave na prethodnoj sjednici. Generalni revizor je naglasio da je Ured u ovom postupku u potpunosti djelovao u skladu s važećim propisima. Istakao je da je još 2024. godine, tadašnjem generalnom revizoru, dostavljena službena Inicijativa za reviziju Općine Kakanj od strane Almedina Aliefendića zastupnika u Predstavničkom domu Parlamentu Federacije BiH. Navedena inicijativa je, u skladu s procedurama, uvrštena u Plan revizije, čime je potvrđeno da je i prethodna uprava Ureda vodila računa o inicijativama koje upućuju parlamentarci.

U nastavku svog izlaganja, generalni revizor i sektorski rukovodilac Marijana Miličević su pružili dodatna pojašnjenja u vezi s provođenjem revizije u Općini Kakanj i njenim subjektima, kao i općenito o kriterijima za pripremu i izradu Plana revizije.

Budući da je predmetna Informacija dostavljena na njegovu inicijativu, Mirsad Zaimović je u svom obraćanju prvenstveno iskazao punu podršku radu Ureda za reviziju. Naglasio je da bi, u slučaju postojanja adekvatnih kadrovskih kapaciteta Ureda, svakako bilo poželjno da se revizija provodi svake godine u svim općinama, kao i u cjelokupnom javnom sektoru. Podsjetio da je na prethodnom zasjedanju problematizirao razloge zbog kojih se u jednoj konkretnoj općini revizija provodi uzastopno tri godine, uključujući provedenu finansijsku reviziju i reviziju učinka, jer je učestalost nadzora u drugim općinama značajno manja. Zbog navedenog je izrazio sumnju u postojanje selektivnog pristupa i potencijalnog političkog utjecaja na proces planiranja revizija od strane Ureda, što svakako ne bi trebalo da se dešava.

Nakon obrazloženja predstavnika Ureda za reviziju i izlaganja Mirsada Zaimovića, predsjednik Komisije je zaključio raspravu i konstatirao da je Komisija primila na znanje predmetnu Informaciju.

3. Godišnji finansijski izvještaj za 2025. godinu Ureda za reviziju institucija u Federaciji BiH

Predsjednik Komisije otvorio je tačku dnevnog reda informacijom da je Ured za reviziju institucija u Federaciji BiH dostavio svoj godišnji finansijski izvještaj za 2025. godinu.

Napomenuo je da je predmetni materijal svim članovima Komisije upućen uz poziv za 29. sjednicu Komisije.

Nakon uvodnog izlaganja predsjednik Komisije je dao riječ predstavnicima Ureda za reviziju institucija u Federaciji BiH. Predstavnici Ureda su u svom izlaganju pružili iscrpno obrazloženje finansijskog izvještaja za proteklu godinu, detaljno prezentirajući sve ključne stavke istog. Posebno je naglašeno da je ukupno izvršenje budžeta ostvareno u iznosu od 85% u odnosu na odobrena budžetska sredstva. Nakon uvodnog izlaganja predstavnika Ureda, zamjenik predsjednika Komisije Damir Džeba, zatražio je dodatna pojašnjenja u vezi razloga izvršenja budžeta u iznosu manjem od odobrenih sredstava. Tražio je preciznije obrazloženje da li se navedeno umanjeno od 15% odnosilo linearno na sve budžetske pozicije ili je prvenstveno rezultat ušteda na poziciji plata i naknada troškova zaposlenih zbog smanjenja osnovica za doprinose i činjenice da nije proveden rebalans budžeta.

Predstavnica Ureda je odgovorila da je do umanjeno došlo prvenstveno zbog ušteda na poziciji plata i naknada troškova zaposlenih zbog smanjenja doprinosa i nedostatka rebalansa budžeta, dok su odstupanja na ostalim budžetskim pozicijama bila minimalna. Nakon provedene rasprave, predsjednik Komisije je stavio na glasanje Izvještaj i konstatirao da su članovi Komisije jednoglasno usvojili Godišnji finansijski izvještaj Ureda za reviziju institucija u Federaciji BiH za 2025. godinu.



**ZAMJENIK PREDSJEDNIKA
PARLAMENTARNE KOMISIJE
ODGOVORNE ZA REVIZIJU**

Damir Džeba, v.r.



**PREDSJEDNIK
PARLAMENTARNE KOMISIJE
ODGOVORNE ZA REVIZIJU**

Elvir Karajbić, s.r.